

## **La pleiv da Breil deplorescha la demissiun da Sur Marcel Köhle.**

A caschun dil survetsch divin dalla dumengia dils 15 da fenadur 2018 ha Sur Marcel surpriu parochians e parochianas cun suandonta comunicaziun:

***„Sunter in liung ed intensiv process da decisiun sun vegnius alla fin da viver a moda publica mia relaziun tier ina dunna ch’jeu haiel empriu d’enconuscher. Duront siat onns sun jeu bugen staus plevon, gie schizun fetg bugen e gest ord quei motiv eis ei fetg grev per mei da far quei pass. Il permanent conflict cun l’empermischun dil celibat e la damonda, tgei viel jeu cun mia veta, han denton mussau e confirmau a mi, ch’ei seigi ussa il dretg mument per prender la decisiun ed ughegiar ina nova entschatta“.***

Quella nunspetgada abdicaziun e la demissiun sco plevon han procurau per gronda consternaziun. Cun Sur Marcel piarda la pleiv da Breil in fetg bien e da tuttas varts zun preziou plevon, ina giuvna e fetg cumpetenta personalitad respectada ed apprezzada da giuven e vegl. Il grond plascher e la satisfacziun d’esser confidai ad in plevon giuven cun spert aviert ei tut surura semidaus en tristezia e procurau per malsegirtad sur digl avegnir da nossa pleiv. La suprastonza da pleiv ha priu per enconuschientscha la demissiun da Sur Marcel ed ha ensemen cun l’assitenta pastoral ed il cussegl pastoral priu las empremas disposiziuns transitoricas pil proxim avegnir. Malgrad tut engaschi vegn ei buca ad esser pusseivel da puder mantener vinavon la purschida actuala. Quella nova situaziun pretenda da tuts/tuttas capientscha e pazienza.

En num da parochianas e parochians engraziein nus a nies preziou plevon Sur Marcel pil grond e premurau engaschi en favur da nossa pleiv. Malgrad il cuort temps da dimora a Breil restan ils fastitgs da siu operar veseivels. Els ein per nus confiart e vegnan era en assenza da Sur Marcel a purtar vinavon bien fretg.

La demissiun da Sur Marcel provochescha ina gada dapli la damonda con ditg che la Baselgia catolica vul aunc schar pendent il problem concernent il celibat. Pli ditg e pli fetg ei il sforz dil celibat in argument decisiv per personas giuvas da buca s’engaschar el survetsch dalla Baselgia!

Suprastonza dalla pleiv catolica Breil/Brigels

### **Ulteriur sclariment tier:**

Sep Cathomas, president pleiv catolica Breil/Brigels  
081 941 16 94 / 079 222 03 26  
sep@cathomas.com